

Covid-19: Abana bari munsi y'Imyaka 5 bagiye guhabwa Urukungo rushimangira

March 15, 2023

Abashashatsi ku by'Inkingo bemeje ko abana bari munsi y'Imyaka 5 bagiye guhabwa Urukungo rwa Covid-19 rushimangira.

Ikigo cya Leta Zunze Ubumwe za Amerika gishinzwe ubugenzuzi bw'ibiribwa n'imiti, FDA, kuri uyu wa Kabiri cyemeje doze y'urukungo rwa Covid-19 rushimangira, rwagenewe abana bari munsi y'imyaka itanu, rwakozwe na Pfizer ifatanyije na BioNTech.

FDA yatangaje ko uruhushya rwo gukoresha urwo rukungo rwatanzwe nyuma yo kwakira amakuru y'igeragezwa ryarwo ryakorewe ku bana 60 bo muri icyo cyiciro cy'imyaka bahawe doze eshatu za mbere.

Nyuma y'ukwezi kumwe bahawe iyo doze, ubudahangarwa by'umubiri wabo byagaragaye ko bufite ubwirinzi buhamye imbere ya Covid-19 na virusi zihinduranyije za Omicron.

Umuyobozi muri FDA, Peter Marks yagize ati

Uruhushya rw'uyu munsi ruraha ababyeyi n'abarezi b'abana b'amezi kuva kuri atandatu kugeza ku myaka ine bahawe doze eshatu z'urukungo rwa Pfizer-BioNTech yo gushimangira ubwirinzi bwabo binyuze muri iyi doze.

Ku rukungo rwakozwe na Pfizer bibarwa ko abana bakingiwe doze zibanza iyo bahawe eshatu mu gihe ku rwakozwe na Moderna bahabwa ebyiri.

Imibare itangazwa na leta yerekana ko abitabiriye guhesha abana doze zibanza z'urukungo rwa Covid-19 ari bake cyane.

Abagera kuri 2,7% gusa mu bari munsi y'imyaka ibiri na 5% bafite kuva kuri ibiri kugeza kuri ine nibo bahawe doze za mbere.

Pfizer ni rwo ruganda rwa mbere ku isi rwakoze inking nyinshi kuva icyorezo cya Covid-19 cyatera. Raporo zivuga ko yinjije agera kuri miliyari 100 z'amadolari umwaka ushize; muri yo miliyoni 57 zavuye mu bucuruzi bw'inkingo n'ubw'ibinini bya Paxlovid.